

KICO A PARA DI NOS CUMINDANAN...

Awendia ta tende tur caminda di BBQ, cuminda crioyo (di un of dos plato) y locual ta wordo usa ultimo añanan, ta carni mechado. Pero hopi di nos a lubida riba nos "Yambo" cu tey ainda pero ta masha poco ta tende di dje. A lubida riba nos "Maripampoen

stoba", nos "kalaloe stoba", nos "breba" stoba. Awendia no ta tende mas di "Salon" cu no ta pisca sala, sino carni di bestia chiquito sala. Ningun hende ta papia mas di nos "toetoe", masha poco hende ta "hala funchi" ainda pasobra tur

cos a bira mas moderno y cuminda di Microwave ta mas facil. pasa rond di nos isla y puntra cuanto hende ainda ta "bati pan". Tur esaki a bay perdi. Nos cunucunan no tey mas.

Tempo nos ta mucha nos ta corda ainda riba e cunucu grandi y cria di bestia cu tabata den vecindario di **Companashi**, unda por ehemplo awe ta situa **Voz di Aruba**.

Aki tabata e cunucu y criadero di un venezolano, "Porfirio" of ta "Portillo", e tempo ey. Criadero yen di baca cu tabata percursa pa nos tin nos carni fresco, y cunucu cu tur sorto di fruta y verdura.

Den Klip na unda despues a bini Strandhotel, Cas di Cul-

tura, John F. Kennedy school y na altura di stadion, tabata tin cunucu di **Colai de Cuba** cu tabata biba banda di unda ta **Brenchi y Homecenter den Wilhelmstraet**.

Colai cu tabata percursa tempo cu **Commissary di Lago** pa tur dia manda dos pa tres baca pa **Commissary** y kende su cunucu semper tabata yen di patia, melon, pampoen, yambo y otro berduranan y fruta.

Esaki tabata nos Aruba di ayera cu a bay perdi, y cu awe hasta nos cuminda crioyo poco poco ta perdiendo su lugar pa importacionnan y modernismo. E Aruba di ayera cu ainda nos ta anhela pa bolbe pero cu lo no bolbe nunca mas.

Juby

AÑORANZA

Mainta, ora mi lanta mi ta haya holor di mi suela mi ta scucha e gainan canta y aroma di pan for di casuela.

Mi ta sinti e frieuw di e nubolina ta casi pareeuw cu mi suela e huma cu ta sali for di cushina y tambe, e voz di mi abuela.

Carne, baca y cabrito ta cana den e gran sabana tur di nan na grito pa alegre nos isla soberana.

Recuerdonan cu ta biba den mi cu ta ser cambia manera paña nos custumber cu ta ser distribi y cu ta bay perdi cada año.

Augusto Croes.